



UPA 2026/147

21/5-2026

Pipaluk Olsen

Suliffeqarfimmik kisimiillutik ingerlatsillutik namminersorlutik inuussutissarsiuteqartut Meerartaarnermut atatillugu sulinngiffeqarnermut aningaasaateqarfimmit meerartaarnermi sulinngiffeqarnermi ullormusianik pissarsisinnaassagunik, suliffeqarfimminnik unitsitsigallartussaajunnaarsillugit imaluunnit matusisinnaajunnaarsillugit Naartunermi, erninermi meeravissartaarnermilu sulinngiffeqartarnek pillugu Inatsisartut inatsisaata allanngortinneqarnissaanut siunnersuosiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Napaartoq Isak Petrussen, Demokraatit)

(Siullermeerineq)

Demokraatit Inatsisartunut ilaasortaatitaata Napaartoq Isak Petrussenip siunnersuummik matuminnga pingaarutilimmik, inunnullu tunngalluinnartumik saqqummiussineranut qujanaq.

Suliffeqarfimmik kisimiillutik ingerlatsillutik namminersorlutik inuussutissarsiuteqartut, meerartaarnermut atatillugu sulinngiffeqarnermi ullormusiaqartarnerinut siunnersuut tunngassuteqarpoq. Siullermilli ilaqutariinnut, toqqissisimanissamut, inunnullu namminneq suliffeqarfeqarnissaminnik toqqaasimasunut naleqquttunik atugassaqartitsinissamut tunngassuteqarpoq. Demokraatini ilaqatariinneq upperaaput. Ilaqutariinni meeqqat toqqissimasarput, isumassorneqartarput, asanninnermillu tunineqartarlutik. Tamanna pillugu inatsisip ilaqutariit tapersersussavai. Meerartaarnissaq pisariaqanngitsumik ajornartissanngilaa. Inuillu ilaqutariinnerup, inuunerminnilu pilersitami akornanni pinngitsaalisamik qinigassissanngilai.

Ullumikkut suliffeqarfimmik kisimiillutik ingerlatsillutik namminersorlutik inuussutissarsiuteqartut, meerartaarnermut atatillugu sulinngiffeqarnermi ullormusiaqassagunik suliffeqarfitsik unitsittariaqarpaat. Allaffissorneq isigalugu tamanna ajornanngitsutut isikkoqarsinnaavoq. Kisianni tamanna namminersortumut aalajangigassaavoq imaannaanngissinnaasoq. Suliffeqarfik inummit ataatsimit ingerlanneqartoq ajutoornissaminut qanitsuarsuusarpoq. Inuttut attaveqarnermik, sullitanik aalajangersimasunik, ataavartunillu suliassanik tunngaveqakkajuttarpoq. Meerartaarnermut atatillugu sulinngiffeqarnermi suliffeqarfik matoqqatinneqassappat sullitat annaaneqarsinnaapput, isumaqatigiissutit kiviinnarsinnaapput, niuunermilu inissisimaneq ajorseriarluni. Ajornerpaamik pisoqartillugu suliffeqarfik ammarneqaqqissinnaanngilaq.

Tamanna naleqqutinngilaq, isumatusaarnerunanilu. Aallarnisaasut amerlanerusut pisariaqartippagut. Suliffeqarfiit mikisut amerlanerusut pisariaqartippagut. Ingerlatanik, suliffinnik, najukkamilu periarfissanik pilersitsisarput. Taamaattumik namminersortuujutugaluni angajoqqaajuneq pisariaqanngitsumik ajornarnerulersissanngilarput.

UPA 2026/147

J.nr 00.00.00/26FM-LABU-00147

Qupp. 1



Namminersortut naleqqutinngitsumik iluaquserneqarnissaannik siunnersuut tunngassuteqangilaq. Eqaatsumik, naleqquttumillu aaqqiissuteqarnissamut tunngassuteqarpoq. Tamakkiisumik suligaanni soorunalimi meerartaarnermut atatillugu sulinngiffeqarnermi ullormusiaqartoqarsinnaassanngilaq. Kisianni killilimmik suligaanni, matussusiinikkulluunniit meerartaarnermut atatillugu sulinngiffeqarnermi ullormusiaqarsinnaanermik ataqatigiissitsisumik aaqqiissummik nassaartoqarsinnaassaaq. Assersuutigalugu saaffiginnissutit akissallugit, suliata ataasiakkaat naammassissallugit imaluunniit minnerpaamik ingerlatsilluni suliffeqarfimmik ingerlatsiinnarnissaq pisariaqarsinnaasarpoq. Tamanna piffissaq tamakkerlugu sulinermiit allaanerujussuuvoq. Allaarussuserlu taanna inatsimmi inissaqartinneqartariaqaraluarpoq.

Meerartaarnermut atatillugu sulinngiffeqarnerup, angajoqqaat toqqissillutik meeqqaminnik ilagisinnaatissavai. Tamanna siunertaavoq. Kisianni aaqqiinerup kingunerisaanik suliffeqarfeeraq annaaneqassanngilaq. Meerartaarnermut atatillugu sulinngiffeqarneq qaangiuppaa angajoqqaq suliffimminut uteqqissinnaassaaq. Nunami maanisut immikkut pingaaruteqarpoq. Suliffeqarfippassuit mikisuupput, inoqarfippaalullu inuit suliniuteqartut pinngitsoorsinnaanngilaat.

Siunnersuut aamma aningaasaqarnikkut akisussaassuseqarpoq. Malittarisassat ima qeratatigimmata namminersortut aaqqiissut atunngippassuk, taava siunertamisut atornaviannngilaq. Malittarisassallu suliffeqarfinnik matusinermik kinguneqassappata, taava inuiaqatigiit ingerlatanik aamma siunissami isertitassanik annaasaqassapput.

Soorunalimi aaqqiissut aqunneqarsinnaasoq qulakkiissavarput. Sinaakkutit ersarissapput, atornerluisoqarnissaanullu illersorneqassalluni. Pisortani aaqqiissutit akisussaassuseqarnermik aallaaveqassapput. Kisiannili allaffissornermut tunngasut naapertuilluarnerusumik aaqqiissuteqarnissamut akimmiffiussanngillat.

Suliffeqarfiutigisaq matunagu meerartaartoqarsinnaassaaq. Ilaqutariissutsikkut naleqqutinngitsumik inissinneqarani aallarnisaasuusinnaasoqassaaq. Aaqqiissutigullu inuit atugaannut naleqqunnerutillugit aaqqiissuunneqarsinnaassallutik.

Taamatut oqaaseqarlunga Demokraatit siunnersuut tapersorsorpaat, innersuussutigalugulu Ilaqutariinnermut Peqqissutsimullu Ataatsimiititaliami nangillugu oqaluuserineqassasoq.